

ओ जी म्हारा नटवर नागरिया,
भगता के क्यों नही आयो रे,
भगता के क्यों नही आयो रे,
संता के क्यों नही आयो रे,
ओ जी म्हारां नटवर नागरिया,
भगता के क्यों नही आयो रे ॥

धन्ना भगत की भगति पुरबली,
वा को खेत निपजायो रे,
बाया टुंबड़ा निपज्या मोती,
बिना बीज निपजायो रे,
ओ जी म्हारां नटवर नागरिया,
भगता के क्यों नही आयो रे ॥

नामदेव कई नानो जी लागे,
वाको छपरो छायायो रे,
मार मंदासो छावन लाग्यो,
लक्ष्मी बंध खिचायो रे,
ओ जी म्हारां नटवर नागरिया,
भगता के क्यों नही आयो रे ॥

सेन भगत कई ससुरो जी लागे,
वाको कारज सारयो रे,
लेर रसोनि नाइ बणग्यो,

नृप को शीस सवारियों रे,
ओ जी म्हारां नटवर नागरिया,
भगता के क्यो नही आयो रे ॥

कबीर कई थारे काको लागे,
वा गर बालद लायो रे,
खांड खोपरा गिरी छुहारा,
आप लदावंन लायो रे,
ओ जी म्हारां नटवर नागरिया,
भगता के क्यो नही आयो रे ॥

मीरा कई थारे मासी लागे,
वाका दुखड़ा टालया रे,
रानो जी विष का प्याला भेज्या,
विष अमृत बनायो रे,
ओ जी म्हारां नटवर नागरिया,
भगता के क्यो नही आयो रे ॥

भीलन कई थारे भुवा लागे,
वाको जुठो खायो रे,
उच नीच की काण न मानी,
रुच रुच भोग लगायो रे,
ओ जी म्हारां नटवर नागरिया,
भगता के क्यो नही आयो रे ॥

कर्मा कई थारे काकी लागे,
वाको खीचड़ खायो रे,

धबलिया रो पर्दों कीन्हो,
रुच रुच भोग लगायो रे,
ओ जी म्हारां नटवर नागरिया,
भगता के क्यों नही आयो रे ॥

पेली तो थे आता कान्हा,
फिर फिर करता काम रे,
नानी बाई को मायरो भरता,
गर का लागे दाम रे,
ओ जी म्हारां नटवर नागरिया,
भगता के क्यों नही आयो रे ॥

कहे नर्सिलो सुनो जी सावरिया,
आनो व्हे तो आओ रे,
ब्याई सागा में भुंडा लागा,
यू कई लाज गमावो रे,
ओ जी म्हारां नटवर नागरिया,
भगता के क्यों नही आयो रे ॥

टेर सुनी नरसी की कान्हो,
राधा रूखमण लायो रे,
भोला भगत की लाज बचबा ने,
दौड़ दौड़ यो आयो रे,
ओ जी म्हारां नटवर नागरिया,
भगता के क्यों नही आयो रे ॥

ओ जी म्हारा नटवर नागरिया,

भगता के क्यों नही आयो रे,
भगता के क्यों नही आयो रे,
संता के क्यों नही आयो रे,
ओ जी म्हारां नटवर नागरिया,
भगता के क्यों नही आयो रे ॥

गायक भैरव शंकर महाराज जोरावरपुरा ।
प्रेषक भैरु शंकर शर्मा ।
चारभुजा साउंड सिस्टम जोरावरपुरा ।
संपर्क 9460405693

Source:

<https://www.bharattemples.com/o-ji-mhara-natwar-nagariya-bhakta-ke-kyo-ni-aayo-re/>



Bharat Temples

Complete Bhajans Collections - Download Free Android App

<https://play.google.com/store/apps/details?id=com.numetive.bhajans>

Facebook: <https://www.facebook.com/bharattemples/>

Telegram: <https://t.me/bharattemples>

Youtube: <https://www.youtube.com/channel/UC24oJCxZJyhhKzSUD-Lt9Tw>